

阿
耨
末
菩
薩
經

籍

第
六

百
一
周
六

47780



元祿九年丙子二月日重脩

皇國聖業

佛日增輝 佛舍輪常轉

山城州天安寺法金剛院置



阿差末菩薩經卷第六

周

西晉三藏竺法護譯 楊茂

阿差末言唯舍利弗菩薩功德業及聖慧業亦不可盡何謂德業若能布施出身所有持戒之德道慧之業常行慈心思惟定意行無極哀奉眾善本為己身施亦為他人合集功德勸施一切三世眾生普及諸學及與不學諸緣覺乘亦復勸助諸初發意學菩薩法逮入行者不退轉等一生補處過去當來諸現在佛普勸德本所行休祚咸皆呪願諸佛賢聖講經法師以是功德使得長存壽命無極勸眾德本雖合福祚其不發意勸發道心以

發心者使度無極若有貧賈救攝以財其身
病者給與醫藥隨時供養不懷諛諂其羸劣
者勸立忍辱其蔽藏罪令不匿過常懷羞恥
列露殃疊奉敬現在諸過去佛愛敬歸命其
師和上常行法施化無師主勤修精進求法
不懈見諸法師視之如佛聽法無厭抱念心
懷聞遠有經十四千里故自舉往不以為勞
雖說經法不慕利養孝順父母夙夜供養不
離左側常念反復乳哺之恩不以懷恨積德
無厭身行謹勅體無綺飭常護口辭不演麁
言自守其意心不懷毒建立佛寺講說精舍
所獲功報猶如梵天何謂梵福初成佛時尋

欲滅度梵天儼然皆來勸助本爲一切欲度
十方五江三源流溢不息願守本誓開度一
切迷惑盲冥顛倒上下六十二見沉塞閉在
九十六徑唯須大聖以明濟之佛言善哉天
王懷慈五濁之世甚難開化當分三乘開化
誘進然後能入無上大道此梵天福不可稱
限其興佛寺功德亦然積無量慶因此功勳
具足諸相三十有二奉行若干衆善之本由
是周滿以十種好修行十善而不自大莊嚴
其身端政姝好棄捐一切惡言麁辭緣是莊
嚴口演辯才常有慈心不懷毒害則莊嚴心
淨如明珠莊嚴佛土神通變化莊嚴經典爲

他人說莊嚴衆會今奉道教棄除兩舌惡口
讒言鬪人詔受經典而觀察之以何開度今
至大道有所班宣未曾越次亦無所枉顏色
和悅衆人見之莫不歡然翦去陰蓋一心聽
經其意明利以爲莊嚴誓首歸命諸佛正覺
莊嚴道場遵衆德本以爲元首淨所生處將
護罪福愛欲塵勞逮得寶掌皆能布施布施
一切重寶故無所希望以無極財而施與者
得致無盡廣大寶藏而常和悅不興感顏以
故親友朋黨同學莫不喜歡等心衆生緣是
得平坦如掌不輕未學喜燃燈火貢上佛寺
父母師友得淨光明靡所不耀積德奉戒行

無沾汙世世所生在清淨處不染他穢若在
胎藏常無垢染奉行善者生於天上還在人
間未曾想念一切結網以故獨步而無虛妄
訓無師法故於諸法最極尊豪志性清淨普
世衆人視之無厭不惜身命未曾欺妄無所
侵枉因本諸願悉能具成諸佛道法緣是之
故備衆德本舍利弗薄立德本將育隨時獲福無
量復過於此不可稱限吾粗舉要不悉散之
何謂慧業所從因由受其神識知五慧通何
謂爲因何謂爲由其多欲者當求佛法明慧
親友常與其俱咨受奉敬執御佛慧不求聲
聞緣覺之乘離於自大奉如尊聖敬如正覺

志性和調覩諸親友遵於慧義不著言辭見
諸法師所行道品不樂外形聞所說法懃修
法教斯行法者是為慧業何謂法業希求少
欲不在汲汲少辭甚言常自覺悟修行精進
有所聞義思惟稱量飢虛於法未曾懈倦其
心鮮明不為五蓋之所覆蔽誨其罪疊消化
衆央其意質朴而無諛諂以行為要愛法樂
法以法為本舉動為法恒求經義如救頭然
髮索及肌懃懃修身習行元元未曾違遠馳
趣殊勝捐棄亂會獨在一處樂於閑居習仁
賢行限節知足未曾退還樂於法樂不慕世
榮求度世法志不忽忘舉動進止常樂要義

求柔順業積累堅要常懷慙恥修敏念慧遣
諸無智棄除愚癡盲冥羅網慧眼清淨其所
覺了極爲曠遠以無爲慧聖意遠照現在智
慧當來功勳不自揚名歎他功勳善修聖業
不離罪福淨修道慧復次其慧業者有四事
施而得致之一曰施帑竹帛二曰以筆施惠
令寫經本三曰施與好墨及以上硯四曰法
師所講演若干法因從啓受一切世間諸可
難致供養法師或以頌偈施與於人若有微
妙法授與法師不懷諛諂至誠布施施此四
事得致慧業逮於五事信戒慧解度知見品
將護四慧而得自在何等爲四一曰將護法

師以爲師主二曰將護種姓不起亂心三曰將護土地鄉邑人意四曰自守護心令不馳騁是爲四事復有四事親近慧業令得成就何謂爲四一曰以深經典奉進法師二曰晝夜慇懃親近慧義三曰衣食供給所乏四曰漸近道場而不退還是爲四緣是之故致五力慧何謂爲五一曰信力二曰解脫力精進不廢博聞無厭三曰意力不捨道心四曰定力等視諸法五曰智力所聞不忘以是爲五戒慧力業復有四事何謂爲四一曰以法安諦奉行業本二曰思惟經典察義所歸三曰以法勸助於正真道四曰務求要訓以法

為戒是為四慧忍業復有四事何謂為四一
曰精進求法若加惡者罵詈其身而皆忍之
二曰愛樂法者若遇鬪訟飢渴寒熱悉能忍
之三曰奉敬善師順和上命四曰元元思法
忍空無相不願之義是為四精進行業復有
四事一曰懃求聽經不以勞倦二曰聞則執
持未曾遺忘三曰精修說法不以懈廢四曰
元元奉行以為正業是為四禪定行業復有
四事一曰根心寂靜而無憤鬧二曰常一其意
苦樂無二三曰一心精專求諸神通四曰了
于佛慧消除俗智是為四智慧行業復有四
事一曰不住斷滅二曰不處有常三曰其心

不迷曉了不亂緣起之本四曰信無吾我是
爲四矣善權慧業復有四事一曰樂世法者
隨俗而化二曰計有人者隨之牽來三曰復
以經道因逮誘進四曰應慧解者因酬度之
是爲四道慧之業復有四事一曰修六度無
極而得至道二曰以達歸盡遊于正化三曰
其學調心謂七覺意四曰常進遵行一切智
慧之本是爲四無厭聖業復有四事一曰聞
法無厭二曰班宣經典而無懈難三曰誠慙
察原不以爲勞四曰剛達高節通利無倦是
爲四矣阿差末復言其能周入若布施者當
正觀業持戒忍辱精進一心智慧慈悲喜護

所以者何菩薩一切雖未成就演智慧首為
聖土地悉歸於道住于正慧化無慧義使歸
大乘一切諸魔不得其便皆為諸佛所見建
立至一切智無上正真是為菩薩聖慧之業
而不可盡阿差末言唯舍利弗菩薩意止亦
不可盡彼自觀身觀他人身本行成精進業
察身報應所從合成知身無主無可貪者猶
如觀外草木衆果叢林菊草從因緣生悉無
主名是身如是猶如草木墻壁瓦石水中之
影五陰四大諸入所惑觀己身空無有吾我
不得久常無有堅固危脆之物分離之法以
是之故不當計身是我所也以此危脆無堅

固身當求要義何謂為要如來身者乃謂真
要吾當勤求成佛聖體無極法身猶如金剛
不可破壞超越一切三界俗身縱使此體瑕
疵無量因是當除一切穢濁當致如來空慧
法身以勤修力合集衆德真誠俱會察四大
身吾以此身皆為衆生志求修道猶如察外
所有四大地水火風成若干形門戶井竈造
立屋宅生活之業以安衆人吾四大身亦復
如是以若干事而依怙之興若干便無量財
貨亦乃得安養身之業觀身苦痛不可稱限
觀形無常生死往返不當復貪無求受形觀
身無我而衆生類不解本末當訓誨之令患

馱此觀身寂然將至一定令修靜嘿當觀身
空無相無願便歸澹泊清淨本際彼觀己身
觀他人身無所慕樂不計堅固知不長存察
內身行不復聽從內諸塵勞愛欲之患又觀
外身未曾復與外塵俱合身無勞穢所行清
淨身以清淨然後逮致像好體嚴身像以成
為過諸天及世間人顏容巍巍無有疇匹是
為菩薩自觀己身觀他人身建立意止何謂
菩薩自觀痛痒觀他人痛痒而得意止菩薩
發意觀察如是所可經歷皆是苦惱彼察痛
痒採求聖慧選擇明智慕樂寂然正使遭樂
不係在欲若存在欲緣致苦痛見諸衆生墮

諸惡趣三塗之難為與大哀不以結網而見
繫縛雖身以值不苦不樂諸痛痒者不為癡
冥諸結羅網而見繫縛雖在痛痒意故寂定
從來所更不苦樂痛則以聖慧顯示衆生棄
捐痛痒無益之義蠲除衆生一切痛痒被澹
泊鎧心自念言此等群黎歸在痛痒不自覺
知縛在衆苦痛痒之地常懷憂感依倚不苦
不樂之痛為之迷荒以是之故不入智慧攝
大哀者入于智慧曉了休息一切痛痒因此
大哀使諸衆生勉除衆難為宣經典何謂名
之為痛痒也心中懷惱或復成樂何謂選擇
此無痛痒無我人壽又彼菩薩不倚痛痒亦

無貪護所受痛痒無反覆行無倒痛痒亦無
妄想諸見痛痒亦無眼耳鼻口身心之痛痒
亦無色聲香味細滑之痛痒眼所矚者從因
緣起計於苦樂無苦無樂是謂痛痒取要言
之内外亦然從因緣生以致痛痒苦樂善惡
不苦不樂其一痛痒因一心識二痛痒者謂
有内外三痛痒者隨過去教從當來行因現
在識四痛痒者謂從四種地水火風五痛痒
者從念五陰色痛痒思想生死識六痛痒者
從六衰故七痛痒者從七識故八痛痒者或
從八邪而迷荒故九痛痒者謂九神處十痛
痒者謂十惡業取要言之一切痛痒皆由貪

樂因從念欲而致衆痛是故言曰不可數人
甚痛無量菩薩於彼觀已痛痒觀他痛痒知
衆群黎起分痛痒當顯慧業使諸衆生因
痛痒慧觀見德本除去諸罪是爲菩薩觀已
痛痒觀他痛痒心意止也何謂菩薩自觀已
心觀他人之心其意止也其菩薩心未嘗忽忘
舉動行步常自將護而復察之心適起已尋
便消滅無常住處不住在內亦不在外不兩
間得吾從初始發菩薩心以來彼心盡滅離
別星散悉無有處其無無處不可恕之心在
其處其心所集衆德之本是亦滅盡離別星
散無處不處不可分別所可因勸發道意者

亦復自然以是故曰心者不知心心者不見
心心心不相待何謂其心而發無上正真道
意成最正覺其道心者不與善合其善本心
不與勸助意共俱合其清淨心不捨道心其
人觀此不恐不怖亦不畏懼又復心念十二
因緣甚爲深妙不失報應所種果實心亦不
著於一切法假使因緣從報應致一切諸法
無有真諦亦無君主恣其所欲而自迷惑吾
當精進執其一心使不退轉何謂心法何謂
迷惑心如幻化無能淨者故爲心法假使皆
捨解迷惑事勸助佛國是亦迷惑心如夜夢
覺不知處是爲心法若於禁戒而行謹慎然

後自勸是五神通是為化變心如野馬本末
滅盡是為心法設以順從一切忍力安和正
覺莊嚴其心而化變矣用勸助之是為化變
心如水月究竟自然寂靜澹泊是謂心法若
悉精進勸發具足無數佛法是為化變心不
可持亦不可見是為心法若復備悉禪思脫
門三昧正受願佛定意是為化變心者無形
無比無教亦無像色是為心法若能班宣分
別智慧勸助佛道推往古世是為化變心無
因緣終不起生是為心法若能導御一切德
本是為化變設無有對心終不起是為心法
若因法報修於道心是謂為變其心境界永

離垢濁初無所生是爲心法若導御心得致
報應至於佛界是謂爲變菩薩自觀已心觀
他人心得神通已其心一定尋見一切衆生
心念因說罪福皆自然矣菩薩自見其心見
他心已則興大哀以興大哀教化衆生不以
勞倦其心不滅亦復不盡堅住其心不與生
死而俱同塵能自制心以此聖慧通達之心
入於不起無所生法不墮聲聞緣覺之地常
自御心堪任具足諸佛道法一心念頌以智
慧心逮得無上正真之道爲最正覺是爲菩
薩自觀已心觀他人心得至意止也何謂菩
薩自觀其法觀他人法得法意止以明智眼

普見諸法未曾中忘至成佛道自觀其法觀
他人法是時菩薩悉見諸法其想於空令脫
空義脫無相願度無所生亦無所滅而離諸
行等見諸法捨於緣起十二牽連觀法界行
菩薩察法不隨非法不計吾我亦不計人壽
命處所是謂為法何謂非法自見吾我計人
壽命觀於斷滅計有常存而見有無合散之
事一切諸法皆是法一切諸法亦復非法
所以者何曉空無相及無願義是一切法皆
為應法自計吾我縛在諸見是一切法悉為
非法彼自觀法觀他人法菩薩行此不見諸
法何所佛法誰非佛法其無徑路無有解脫

亦無生死皆能開導一切諸法處於衆生逮
得無蓋無極大哀療諸塵勞已心發念是無
塵欲亦無不塵所以者何是所趣者開度平
等不疑塵勞不畏貪欲曉了是者乃名曰佛
塵欲自然道亦自然立心如足雖有所住亦
無處所不住立意而名曰住是謂爲住立於
法界不住法界不住人界則無所住名曰虛
空一切諸法等如虛空若有菩薩自觀身法
觀他人法則能等御諸佛道法一切諸法皆
歸解法若曉了者乃能顯發盡於無爲亦無
所盡道無生處不生之處觀察衆生未曾捨
離無生本際趣法意止意在諸法而令堅住

不著聲聞緣覺佛法何謂不著何謂處當心
所在處常能堅住其住不迷未曾忽忘觀已
來際其法所由亦觀他法而得意止班宣
無量分別章句所行無際等御佛法可悅一
切衆生心念降伏衆魔得自在慧乃謂道義
是為菩薩自見已法見他人法得至意止何
謂四意斷而不可盡身諸惡法未興起者令
不起生以生尋滅而修精進自攝其心所念
順義益加精勤是謂平等奉精進行不失順
節習修平均以能攝心觀於正諦此之謂也
所以者何所念順義惡不善法不復重來何
謂不善毀戒亂定惑於智慧何謂毀戒欲生

天上則謂毀戒不從法教其缺戒品是謂毀
戒何謂亂定違失禮誼行不專精心在他念
是亂定意何謂惑於智慧斷諸邪見見見若干
品顛倒諸事陰蓋礙法其缺智慧是謂不善
假使諸惡如是像法興起來者而不聽之是
一意斷假使諸惡不善法興即尋覺之知之
非法不善報應了之損耗爲行穢矣名之冥
室修奉順義消不淨欲則以慈心而除瞋恚
解十二緣而滅愚冥其盡塵勞是謂爲斷同
因緣起觀其所生不得本末而無所斷一切
諸法從習行致是二意斷設令善法未興起
者勸令興發顯使精進自攝其心嘆無量德

所以者何善法無量菩薩大士所應修行當
樂慧根衆德之本皆由精進致諸福慶顯揚
通致德祚之原是三意斷所可謂言善法若
興令得堅任不畏失節不忽忘之益樂元元
夙夜精進自攝其心以勸助道斯謂平等所
以者何勸道心者德本不朽所以者何其心
清淨雖處三界而無所著若有勸助德猗三
界則謂盡索若能勸樂志一切智諸通慧本
終不損耗是四意斷何謂菩薩而修神足神
足有四已自發樂殷懃精進彼以何習興神
足本當行四等慈悲喜護常當遵習四無放
逸廣大其心而不貪身以能治心講第一禪

如是至四以得禪定身心輕便身心以便所
謂入神通以入神通即生神足勤修精進元
元志道以勤樂故輒親道義以精進故能成
此法以勤修故而致此義一心觀察以方便
法曉致神足故謂神足常愛樂故能有所變
以精進故能使成就以專精故能了廣大聊
自修德輒成於道有計於彼菩薩神足緣是
之故而得親近其心自在所欲至到無能違
者諦行所故究竟根原衆行備悉魔不能制
等如虛空徹視無邊洞聽無際定意無限神
足無底見一切根自覩其原是爲菩薩行四
神足而不可盡何謂菩薩修於五根而不可

盡何謂爲五一曰信根二曰精進根三曰意根
四曰定根五曰慧根何謂信根常信諸法何
謂爲法其正見者信遊生死隨其神足以成
彼行不樂他神而解第一真諦之義脫于深
妙十二因緣無吾我入空無相願無所著相
普信諸法不墮諸見信諸佛法信於十力四
無所畏不懷狐疑亦無猶豫合集佛法令無
限際是謂信根何謂精進根所信法者因此
精進諸根益明踰日月光光是精進根所可用
法修精進根猶是之故不失意根其意曠大
不住崖際是謂意根斯意靜然不違意根意
廣如空以定意根專精無亂是謂定根其定

意根常住寂靜而專守一是謂慧根觀察曉
了若於此法如是色像分別無我是謂慧根
如是五根能具足者是謂法具其能具者任
受決地而不動移猶如外學子五通仙人雖視
胎中不能豫別男女之根諸佛世尊亦復如
是菩薩所學未成五根則不授決五根以達
然後受決是為菩薩五根無盡何謂諸力則
有五力而不可盡何謂為五一曰信力二曰
精進力三曰意力四曰定力五曰慧力何謂
信力常懷篤心在一寂靜而不迷荒無有色
像往見佛形亦知他法一心寂靜所在信力
未曾退轉是謂信力何謂精進力設常元元

修於精進在在修德勤於經典所生之處其
心堅強所修德本天上世間無能毀者亦不
能制令不增益由是之故德本興盛至無限
量是精進力何謂意力所在念法心不懈廢
愛欲衆難無能犯者以此意力越衆塵勞其
菩薩者意之所念天上世間無能亂者是謂

意力何謂定力若在衆會遊憤鬧中所在寂
靜班宣道力進止行步第一禪者無能蔽礙
所修德本專精道行亦無能毀第二禪者修
於歡悅內情澹泊而不有礙第三禪者欲化
衆生將護正法無所觀察逮於四禪亦無所
礙以此四禪所行品類無能踰者所修定意

無能亂者定意自在是謂定力何謂慧力若
處俗法及度世法悉能曉了所生之處無能
為師悉知世俗章句文字所造立業神仙異
術五經六藝方俗異書菩薩不學自然知之
及度世法無所不通菩薩以此聖明之慧心
能通暢天上世間獨步無侶隨時班宣是謂
慧力而不可盡

阿差末菩薩經卷第六

周

流溢

下夷一
反滿也

姝好

上尺
反朱

棄捐

二字
音緣

讒說

上助

街

翦

翦字

粗

才反

古

尠

息少

也

菑草

上楚

俱

作葛

反

危

上音

脆

下取

堅也

反

係

音

蠲除

上玄

反

聊

音察

狐疑

上胡

音

